

Källa: Språkrådet

Sinun oikeus käyttää kansalisia minuriteettikieliä

Jos sie kuulut johonki kansalisista minuriteetistä niin sulla on oikeus käyttää omaa kieltä yhteyksissä viranomhaisitten kans. Tässä saat tietää mikkä kieleliset oikeuet sulla on ja mitä saatat vaatia sinun kunnalta ja muilta viranomhaisilta.

Janyaarin ensimmäisenä päivänä 2010 tuli uusi laki kansalisista minuriteetistä ja minuriteettikielistä. Kansaliset minuriteetit on juutalaiset, roomit, saamelaiset, ruottinsuomalaiset ja torniolaaksolaiset. Kansaliset minuriteettikieliet on jiddisch, romani (romani chib), saamen kieli, suomi ja meänkieli.

Kaikkia kansalisia minuriteettikieliä pittää suojata ja eesauttaa

Laki sanna ette kansalisia minuriteettikieliä pittää suojata ja eesauttaa. Sillä, joka kuuluu kansalisheen minuriteettiin, pittää olla oikeus oppia, kehittää ja käyttää omaa minuriteettikieltä. Viranomhaisitten pittää kuunella kansalisia minuriteettiä ja ottaa huomioon heän tarpeet.

Viranomhaisilla on velvolisuus informeerata sinua sinun oikeuksista, riippumatta siitä mitä kansalista minuriteettikieltä sie puhut ja siitä missä sie asut Ruottissa.

Erityisen vahvat oikeuet suomele, meänkielele ja saamen kielele

Erityisen vahvat oikeuet on sillä joka puhuu suomea, meänkieltä eli saamen kieltä ja assu jonku hallintoalueen kunnassa. Tämän sivun alaosassa näet jos sinun kunta kuuluu johonki hallintoalueeseen.

Sulla, joka asut hallintoaluekunnassa, on oikeus komyniseerata viranomhaisitten kans omala kielelä. Sinun pittää saa vastaus suulisesti eli kirjoitettuna samala kielelä.

Sie saatat vaatia lasten- eli vanhoitteenhoitoa kokohnaans eli osittain suomeksi, meänkielelä eli saamen kielelä.

Jos sie asut Kirunan, Jellivaaran, Arjeplogin, Jokkmokin, Haaparannan, Pajalan eli Mataringin kunnassa, sulla on oikeus käyttää minuriteettikieltä yhteyksissä tuomioistuihmeen.

Sinun, joka asut kunnassa joka ei kuulu mihinkhään hallintoalueeseen, pittää kans saattaa olla yhteyksissä viranomhaishiin ja saa vanhoitteenhoitoa suomeksi, meänkielelä eli saamen kielelä, jos on olemassa henkilökuntaa joka hallitsee kielen. Viranomhaisitten pitäs huolehtia siitä, ette on kielitaitosta pärsunaalia ko sitä tarttee.

Riippumatta siitä missä sie asut, sinun häätyy aina saattaa kirjottaa suomeksi, meänkielelä ja saamen kielelä Valtiopäivitten asiamiehile, Jystitsiekanslerille, Siukkakassale, Verolaitokselle ja Tiskrimineerinkiasiamiehele.

Tänne saatat kääntyä

Jos sie piät ette sinun kunta eli muut viranomhaiset ei nouata lakia, sie saatat ottaa yhteyden Stockholmin läänin Lääninhallituksen eli Saamekäräjitten kans, jotka pitävät valvoa ette lakia nouatethaan. Saamekäräjillä on vastuu saamen kielestä ja Lääninhallituksela Stockholmin läänissä on vastuu muista kielistä.

[Minuriteetikysymyksitten osasto Lääninhallituksessa Stockholmin läänissä](#)

Tel 08 – 785 40 00

[Sametinget](#)

Tel 0980 – 780 30